



KABINET DIREKTORA

Broj:

Datum:

Na osnovu člana 7.stav 1. i 2. i člana 8. stav 1. Zakona o sistemu indirektnog oporezivanja u Bosni i Hercegovini („Službeni glasnik BiH“ broj 44/03 i 52/04) člana 61. stav 2. Zakona o Upravi („Službeni glasnik Bosne i Hercegovine“ broj 32/02) i člana 54. stav 2. Zakona o porezu na dodatu vrijednost („Službeni glasnik BiH“ broj 9/05 i 35/05), direktor Uprave za indirektno-neizravno oporezivanje, donosi:

INSTRUKCIJU

o uslovima i načinu povrata poreza na dodatu vrijednost stranim državljanima

I. OPĆE ODREDBE

Član 1.

Ovim uputstvom propisuju se uslovi i način povrata poreza na dodatu vrijednost (u daljnjem tekstu PDV) stranim državljanima.

Član 2.

Strani državljani su fizička lica koja nemaju stalno mjesto prebivališta u Bosni i Hercegovini.

Član 3.

Lica iz tačke 2. ovog Uputstva imaju pravo na povrat PDV na dobra koja kupe u Bosni i Hercegovini i iznese ih u prtljagu koji nosi sa sobom izvan carinskog područja Bosne i Hercegovine.

Član 4.

Pravo na povrat PDV iz tačke 3. ove Instrukcije ne odnosi se na: mineralna ulja (petrolej, dizel-gorivo, ulje za loženje ekstra lako i lako specijalno, motorni benzin-bezolovni, motorni benzin), alkohol i alkoholna pića i prerađevine od duhana.

II. ZAHTJEV ZA POVRAT POREZA NA DODANU VRIJEDNOST

Član 5.

Strani državljani koji iznose dobra kupljena u Bosni i Hercegovini, a na koja je plaćen PDV, pravo na povrat PDV ostvaruju na osnovu Zahtjeva za povrat PDV.

Član 6.

Zahtjev za povrat PDV podnosi se na Obrascu „PDV-SL-2“ (Zahtjev stranog državljanina za povrat PDV), koji je sastavni dio Pravilnika o primjeni Zakona o porezu na dodanu vrijednost.

Član 7.

Obrazac PDV-SL-2 popunjava obveznik-prodavac, na zahtjev kupca-stranog državljanina, u 3 (tri) primjerka, od kojih original i jednu kopiju prodavac daje kupcu, a drugu kopiju zadržava u svojoj dokumentaciji. Prodavac svojim potpisom i pečatom ovjerava Obrazac PDV-SL-2.

Član 8.

Prodavac naplaćuje od kupca ukupnu vrijednost isporučenih dobara sa PDV-om.

III. USLOVI ZA POVRAT PDV-a STRANIM DRŽAVLJANIMA

Član 9.

Kupac – strani državljanin ostvaruje pravo na povrat PDV-a ako prilikom napuštanja carinskog područja BiH, carinskoj službi da na uvid račune, kupljena dobra i original popunjen Obrazac PDV-SL-2.

Član 10.

Carinska služba, prije ovjere Obrasca PDV-SL-2, dužna je utvrditi da li su ispunjeni sljedeći uslovi:

- da su podaci iz putne isprave istovjetni sa podacima iz Obrasca PDV-SL-2;
- da su dobra data na uvid istovjetna sa dobrima navedenim u Obrascu PDV-SL-2 i na priloženim računima, kao i da ta dobra nisu korištena;
- da je ukupna vrijednost dobara sa PDV iskazana na Obrascu PDV-SL-2 veća od 100,00 KM;
- da se dobra iznose prije isteka roka od tri mjeseca od dana isporuke (kupovine) u BiH;
- da je original Obrazac PDV-SL-2 ovjerio i potpisao prodavac.

Član 11.

Ako Carinska služba utvrdi da su ispunjeni svi navedeni uslovi za povrat PDV-a, ovjerava Obrazac PDV-SL-2 i priložene račune potpisom i pečatom i u Obrazac PDV-SL-2 unosi datum iznošenja dobara iz carinskog područja BiH.

Član 12.

U slučaju da Carinska služba utvrdi da nisu ispunjeni svi navedeni uslovi za povrat, vrši ovjeru Obrasca PDV-SL-2 u donjen desnom polju, čime kupac-strani državljanin ne može ostvariti pravo na povrat PDV-a plaćenog pri nabavci dobara u BiH.

Član 13.

Original računa i ovjeren Obrazac PDV-SL-2 Carinska služba vraća kupcu, a kopiju Obrasca PDV-SL-2 zadržava za svoje potrebe.

IV. NAČIN POVRATA PDV-a

Član 14.

Kupac ili podnosioc zahtjeva ovjereni original Obrasca PDV-SL-2, kojim je odobren povrat, mora, u roku od tri mjeseca od dana izdavanja računa, dostaviti prodavcu od koga je kupljeno dobro. Ako se Obrazac PDV-SL-2 dostavlja poštom, kupac ili podnosioc zahtjeva je obavezan prodavcu dostaviti broj računa u banci na koji će se izvršiti povrat plaćenog PDV-a.

Član 15.

Na osnovu ovjerenog originala Obrasca PDV-SL-2 prodavac vrši povrat plaćenog PDV kupcu ili podnosiocu zahtjeva.

Član 16.

Povrat PDV vrši se u KM gotovinskom isplatom ili uplatom na račun u banci koji navede kupac ili podnosilac zahtjeva.

Član 17.

Ako je isplata u gotovini, prodavac je obavezan da izvrši povrat PDV odmah, a ako se doznačava na račun kupca, odnosno podnosioca zahtjeva, uplata se vrši u roku od 15 dana od dana prijema zahtjeva.

Član 18.

Kupac ili podnosilac zahtjeva potpisom na ovjerenom originalu Obrasca PDV-SL-2 potvrđuje datum prijema vraćenog iznosa PDV u gotovini.

V. EVIDENCIJA KOD PRODAVCA

Član 19.

Ovjereni original Obrazac PDV-SL-2 potpisan od strane kupca ili podnosioca zahtjeva o prijemu vraćenog PDV u gotovini, odnosno izvršen nalog za prenos sredstava po osnovu povrata PDV, služi prodavcu kao dokaz za poresko oslobođenje sa pravom na odbitak ulaznog poreza.

Član 20.

Prodavac umanjuje iznos izlaznog PDV-a za iznos PDV-a vraćenog kupcu i to u poreskom periodu u kojem je izvršen povrat PDV-a.

Član 21.

U slučaju da je Carinska služba izvršila odbijanje ovjere u donjen desnom polju, čime kupac-strani državljanin nije ostvario pravo na povrat PDV-a plaćenog pri nabavci dobara u BiH, prodavac nema pravo na umanjenje izlaznog PDV-a.

Član 22.

Prodavac je obavezan da vodi posebnu evidenciju o izdatim Obrascima PDV-SL-2 i o povratu PDV-a kupcima.

Evidencija sadrži podatke o:

- evidencionom broju Obrasca PDV-SL-2;
- broju putne isprave stranog državljanina;
- broju i datumu računa iz Obrasca PDV-SL-2;
- iznosu naknade za isporučena dobra bez PDV;
- iznosu PDV sadržanog u naknadi za isporučena dobra;
- datumu prijema ovjerenog originala Obrasca PDV-SL-2 ;
- iznosu PDV koji je vraćen na ime povrata PDV-a;
- datumu povrata PDV.

VI. PRELAZNE I ZAVRŠNE ODREDBE

Član 23.

Ova Instrukcija primjenjuje se od 1.1.2006.godine.

Instrukcija će se objaviti na Web stranici Uprave i na oglasnoj ploči u Središnjem uredu i Regionalnim centrima.